

և անձնէր ղեկավարութեան տակ մի շարք մասնագէտներ*) կատարում էին նախապատրաստական աշխատանքներ. ուսումնասիրում էին Հայաստանի շինւածանիւթերը, հաւաքում նախանիւթ, պատրաստում վերաշինական ծրագրներ ու յատակագծեր: Ակադ. Թամանեանը կազմել էր Երևան քաղաքի բարեփոխւած նոր յատակագիծը,**) պատրաստել էր տիպար գեղերի, դպրոցների, հիւանդանոցների, ժողովրդական տների, պետական և հասարակական շէնքերի յատակագծեր, որոնք բոլորն էլ հիմքում ունէին հայկական ազգային ոճը: Վարչութիւնը սկսել էր կառուցանել Երևանի մանրէաբանական հիմնարկութեան շէնքը, հիմնական վերանորոգութեան էր ենթարկել քաղաքային առաջին հիւանդանոցը, կազմակերպել էր դաջ այրելու գործարան, Անիի շրջանում ձեռնարկել էր յուշարձանների հաւաքման, ցուցակազրութեան և պահպանման գործին:

Նոյն խնամ. նախարարութեան կից գործում էր և Գլխաւոր Բժշկա-Առողջապահական վարչութիւնը խնամ. նախարարի օգնական բժ. Յ. Տէր-Միքայէլեանի գլխաւորութեամբ: 1919թ. սկզբին Հայաստանում կար միայն 9 հիւանդանոց 300 մահճակալով: Նոյն տարւայ վերջը արդէն գոյութիւն ունէր 30 հիւանդանոց 1,600 մահճակալով, 5 բժշկակայան, 5 բուժակի կայան: 1920թ. դրանց վրա աւելացան մի շարք ուրիշ նոր հիւանդանոցներ ու կայաններ Երևանում, Ալեքսանդրապոլում, Կարսում, Ջալալ-Օղլիում և այլն: Կային պետական դեղատներ, որտեղից դեղ էր տրւում չքաւորներին ձրի, իսկ աշխատւորներին 50% զեղջով: Երևանում կար կենտրոնական դեղապահեստ: Մալարիայի դէմ պայքարելու նպատակով Երևանի, Իգդիրի, էջմիածնի, Հրազդանի, Ղամարուի շրջաններում գործում էին բժշկական թուղթիկ խմբեր և այցելու հիւանդանոցներ: Սկսւել էին ջրանցքային աշխատանքներ Ղամարուի ճահիճների չորացման համար: Երևանում կազմւել էր յատուկ մի մարմին—«Տրոպիկ Հիւանդութիւնների Յանձնաժողով»—որ ունէր տրոպիկական հիւանդանոց, կազմակերպեց «տրոպիկական ցուցահանդէս», հրատարակեց «Մալարիա» պարբերականը և նպատակ ունէր կուել մալարիայի դէմ: Յետագային այս «Յանձնաժողովը» վերածւեց Տրոպիկական Ինստիտուտի:

Տնտեսական տեսակէտից կարևոր աշխատանք էր կատարւում և Գիւղատնտեսական ու Պետական Գոյքերի Նախարարութեան մէջ: 1920 թւի ամառը վերջացան Ս. Զաւալիչիւնի ջրային ընդարձակ հետազոտութիւնները: Եւ սկսեցին հանքային լայն հետազոտութիւններ նախարարութեան հանքային բաժնի պետ Ս. Թուրեանի ղեկավարութեամբ: Հրաւիրեցին մի շարք հեղինակաւոր մասնագէտներ՝ ինժ. Կարապետեանը, ինժ. Ն. Տէր-Միքայէլեանը, ինժ. Մ. Տէր-Դաւթեանը և ուրիշներ, որոնցից կազմւած յանձնա-

*) Սրանց շարքին էր երիտասարդ երկրաբան Այվազեանը, որ Հայաստանի շինւածա-
 փառքի լաւագոյն մասնագէտներից մէկն էր և որ այնպէս անժամանակ մեռաւ մօտ երկու
 տարի առաջ:

**) Այս յատակագիծը, Թարիգում կատարւած որոշ լրացումներով, յետագային
 ընդունեց և այժմ անց է կացւում կեանքում: